

Սիրելի հայրենակիցներ,

«Լրատու»-ի այս թիւին պատրաստութիւնը կը զուգահիշի Կիպրոսի տնտեսութիւնը վերջնական սնանկութենէ փրկելու համար տարուած գերմարդկային ճիգերուն եւ ճգնաժամային պահերու նախօրեակին:

Մի քանի շաբաթներ առաջ միայն ընտրուած Նախագահին ու կառավարութեան դիմաց դրուեցաւ Կիպրոսի դրամավարկային համակարգին խիստ վտանգաւոր կացութիւնը: Դրամատուները անմիջապէս փակուեցան. իրավիճակ մը, որ «Եուրոկրուֆ»-ի ճնշիչ պայմաններուն տակ, շփոթի ալիք մը յառաջացուց կղզիէն ներս: Ժամանակը դէմ կը գործէր երկրին ապագային նկատմամբ ու պետք էր առանց յապաղումի առաջքը առնել: Երկրին տնտեսութիւնը վերականգնելու նպատակով, գրեթէ ոչինչ մնացած էր ընելու՝ բացի դիմել չարեաց փոքրագոյն լուծումին:

Նորընտիր Նախագահ Պրն. Նիկոս Անաստասիատիս եւ իր գլխաւորած պատուիրակութիւնը, 24 Մարտին երկրորդ անգամ ըլլալով, մեկնեցան Պրիւքսէլ, ուր տեղի ունեցան երկարաժամ բանակցութիւններ մինչեւ առաւօտեան կանուխ ժամերը: Ձեռքբերուած արդիւնքը, տիրող չափազանց դժուար պայմաններուն տակ, միակ ելքը կարելի եղաւ համարել վերջնական փլուզումէ փրկելու անդունդին եզրին հասած դրութիւնը: Տնտեսութեան Նախարար Պրն. Սիխալիս Սարրիսի արժեւորումով պատերազմը չչափեցանք, սակայն կարելի եղաւ երկիրը դնել տնտեսական երկարատեւ վերակառուցման ծրագրի մը ճամբուն վրայ, որ

մինչեւ 2018 թուական պիտի համապատասխանէ մնացեալ Եւրոպական երկիրներու մակարդակին:

«Ծանօթանանք Կիպրոսի Զանրապետութեան Օրէնքներուն» բաժինով, հակիրճ ձեւով նշած ենք Կիպրոսի վարկային համաձայնագիրին շուրջ համաձայնուած կէտերը:

Յոյսով ենք, որ կարիքը չենք ունենար յաւելեալ խստապահանջ պայմաններու գործադրումին եւ յաջորդող տարիներու ընթացքին, կարելի կը դառնայ աստիճանաբար դուրս գալ այս ճգնաժամէն:

Գալով Կիպրահայ համայնքին, Կիրակի, 27 Յունուար 2013-ին, միացեալ կազմակերպութեամբ Ազգային Իշխանութեան եւ Երեսփոխանական Գրասենեակին, Նիկոսիոյ Նարեկ Վարժարանի սրահին մէջ տեղի ունեցաւ «Մենք կ'երգենք Ձեզի համար» գեղարուեստական երեկոն՝ նուիրուած Սուրիահայութեան: Ձեռնարկին մանրամասնութեամբ անդրադարձած ենք «Լրատու»ի թիւ 5 էջով:

Ինչպէս տեղեակ էք, Փետրուարի սկիզբը Կիպրոսի թրքագրաւեալ շրջանին մէջ լոյս տեսնող թերթերուն մէջ հրապարակուեցաւ յայտարարութիւն մը, որու մէջ կը նշուէր, թէ Կիպրոսի գրաւեալ շրջանի Վիքթորիա փողոցին վրայ գտնուող Զայկական Եկեղեցական համալիրը մշակութային կեդրոնի պիտի չվերածուի: Այս ձեռքբերումը կարելի եղաւ ապահովել շնորհիւ Կիպրահայ համայնքի ցուցաբերած միասնական ջանքերուն, դիւանագիտական առաքելութիւն իրականացնող պատուիրակութիւններու եւ հեղինակութիւն ունեցող կազմակերպութիւններու եւ անհատներու մօտ՝ ի մասնաւորի Միացեալ Նահանգներու Կիպրոսի մէջ Դեսապան Ն.Վ. ճոն Քէօնիկի:

Այս տարի դարձեալ պիտի այցելենք Ս. Մակարայ Վանք Կիրակի, 19 Մայիս 2013-ին, մեր ուխտը վերանորոգելու եւ անգամ մը եւս հաստատելու, թէ Կիպրահայ Զամայնքը տէր է ու կառչած կը մնայ իր պատմամշակութային արժէքներ-

րուն: Ներփակ պիտի գտնէք այս ուխտագնացութեան գծով յայտարարութիւնը:

Խօսքիս վերջաւորութեան մեծ հաճոյքով կը փոխանցեմ, թէ «Նանոր» Հայկական Մանկական Կեդրոնի կազմակերպական եւ այլ աշխատանքները գրեթէ ամբողջացած ըլլալով, Ապրիլ 15-էն սկսեալ պիտի սկսին մանկամտօրի արձանագրութիւնները: Հետաքրքրուող ծնողներէն կը խնդրենք կապ հաստատել ներփակուած յայտարարութեան մէջ յիշուած հեռաձայնի համարին, ստանալու յաւելեալ տեղեկութիւններ:

Սիրելիներ,

Հայ Առաքելական Եկեղեցւոյ Ս. Ջատիկին առիթով ընդունեցէք իմ սրտագին բարեմաղթութիւնները:

Քրիստոս յարեաւ ի մեռելոց, օրհնեալ է Յարութիւնն Քրիստոսի:

Վարդէս Մահտեսեան

Կիպրահայ Համայնքի Պետական Ներկայացուցիչ

ԵՌԱՄՍԵԱՅ ԳՈՐԾՈՒՆԵՈՒԹԻՒՆ

Կիպրահայ գաղութի կեանքէն

Կիրակի, 13 Յունուար 2013-ին, Տէր եւ Տիկին Վարդգէս Մահտեսեաններ ներկայ գտնուեցան Նիկոսիոյ Ս. Աստուածածին Եկեղեցւոյ մէջ, Մելգոնեան անմահ բարերարներու յիշատակին մատուցուած Հոգեհանգստեան պաշտօնին: Ապա, Պետական Ներկայացուցիչը, ազգայիններու ընկերակցութեամբ, այցելեց Մելգոնեան բարերարներու դամբանը իր յարգանքի տուրքը մատուցելու:

Շաբաթ, 19 Յունուար 2013-ին, Պետական Ներկայացուցիչը ու իր տիկինը, յատկապէս հրաւիրուելով, ներկայ գտնուեցան նախագահական թեկնածու Նիկոս Անաստասիատիսի փափաքով տրուած այցելութեան, որ տեղի ունեցաւ Հ.Ս.Ը.Մ.-Հ.Ե.Մ. ակումբին մէջ: Նախագահական թեկնածուի բազմանդամ պատուիրակութեան մէջ կը գրտնուէին ՏԻԿՕ կուսակցութեան Նախագահ Մարիոս Կարոյեան, Ստրովոլոսի քաղաքապետ Լազարոս Սավիտիս, եւրոերեսփոխաններ Եօաննիս Կասուլիտիս եւ Էլէնի Թեոխարուս:

Նոյն օրը երեկոյեան, Տէր եւ Տիկին Վարդգէս Մահտեսեաններ ներկայ գտնուեցան Նիկոսիոյ Ledra Rotary Club-ի կազմակերպած «From Hearts to Hearts» բարեսիրական բնոյթ կրող գեղարուեստական ելոյթին: Այս ձեռնարկին իրենց մասնակցութիւնը բերին Վարդան եւ Սոնա Կարկալոյեան արուեստագէտ ամուլը եւ Հիլտա Բարոյեանը:

Հինգշաբթի, 24 Յունուար 2013-ին, Պետական Ներկայացուցիչը եւ իր տիկինը, յատկապէս հրաւիրուելով, ներկայ գտնուեցան Թելեմախոս Կանդիոս հաստատութեան կազմակերպած բարեսիրական բնոյթ ունեցող գեղարուեստական ելոյթին, մասնակցութեամբ արուեստագէտներ՝

Ալեքս Մոսկոֆեանի եւ Նառա Սարտարեանի:

Կիրակի, 24 Փետրուար 2013-ին, Տէր եւ Տիկին Վարդգէս Մահտեսեաններ ներկայ գտնուեցան Նիկոսիոյ Ս. Աստուածածին եկեղեցւոյ մէջ մատուցուած հոգեհանգստեան արարողութեան՝ ի յիշատակ Սումկայիթեան ջարդի նահատակներուն:

Չորեքշաբթի, 27 Փետրուար 2013-ին, Պետական Ներկայացուցիչը ներկայ գտնուեցաւ չորս նախակրթարան դպրոցներու՝ ներառեալ Նիկոսիոյ Նարեկ հայկական վարժարանի միօրեայ միջոցառումին, կազմակերպութեամբ Մարոնիթ Յամայնքի Այիոս Մարոնաս դպրոցին «Բոլորս տարբեր, բոլորս հաւասար» թեմայով:

Ուրբաթ, 29 Մարտ 2013-ին, Տէր եւ Տիկին Վարդգէս Մահտեսեաններ իրենց բնակարանին մէջ հիւրասիրեցին Յ.Ա.Ը.Մ.-ի Միջ-դիւանային 8-րդ խորհրդաժողովին տարբեր երկիրներէ Կիպրոս ժամանած պատուիրակութիւնները: Իսկ Կիրակի, 31 Մարտ 2013-ին, յատկապէս հրաւիրելով, Պետական Ներկայացուցիչը ու իր տիկինը ներկայ գտնուեցան այս առիթով Յ.Ա.Ը.Մ.-Յ.Ե.Մ.-ի սրահին մէջ տեղի ունեցած ճաշկերոյթին:

Սուրիահայութեան նուիրուած Համերգ՝ «Մենք Կ'երգենք Ձեզի Համար»

Կիրակի, 27 Յունուար 2013-ի երեկոյեան, միացեալ կազմակերպութեամբ Ազգային Իշխանութեան եւ Երեսփոխանական Գրասենեակին, Նիկոսիոյ Նարեկ Վարժարանի սրահին մէջ մեծ յաջողութեամբ տեղի ունեցաւ «Մենք Կ'երգենք Ձեզի Համար» գեղարուեստական երեկոն՝ նուիրուած Սուրիահայութեան: Սրահը լեցուած էր հոծ բազմութեամբ, իսկ ձեռնարկի իրականացման համար, սիրայօժար կերպով իրենց մասնակցութիւնը բերին Կիպրահայ արուեստագէտներ, ներկաներուն պարզելելով անմոռա-



Նալի պահեր: Մեկնաբանուեցան արդի ու դասական յօրինումներ եւ զուգերգներ, ինչպէս նաեւ հրամցուեցան երաժշտական կատարումներ: Առաջին անգամ ըլլալով, Կիպրահայ գաղութը կարողացաւ տեղական ուժերով իրականացնել բարձրորակ համերգ մը, 90 վայրկեան տևողութեամբ, որ տպաւորիչ խանդավառութիւն ստեղծեց բոլորին մօտ եւ անսահման գոհունակութիւն պատճառեց կազմակերպիչ կողմերուն:

Բացման խօսքով ելոյթ ունեցաւ Տիկին Անահիտ Էսկիծեան, որ իր կարգին մեծ ներդրում ունեցած էր համերգի կազմակերպչական աշխատանքներուն մէջ: Օրուան հանդիսավարն էր Տիկին Ռօզին Մոմճեան: Բեմայարդարունը կատարած էր Պրն. Յաբէթ Թուլունճեան, իսկ լուսաւորման սարքաւորումները հայթայթուած էին Պրն. Սիմոն Թոֆարիտիսի կողմէ: Յիշատակութեան արժանի են բոլոր մասնակիցները, որոնք ստացան անհատական շնորհաւորագիրներ Պետական Ներկայացուցիչին կողմէ. Յովիկ Տեմիրճեան, Գոռ Մելեան, Մարի-Լուիզ Գուլյումճեան, Ալիսիա Ռս-

Կանեան, Յայկ Մահտեսեան, Նառա Սարտարեան, Լիլիան Խաչատուրեան, Յիլտա Բարոյեան եւ Ալեքս Մոսկոֆեան:

Երեկոն վերջ գտաւ մասնակից արուեստագէտներու Երեւան-Էրեբունի խմբերգի կատարողութեամբ եւ ապա՝ Սրբազան Յօր քաջալերական խօսքերով:



Այս ձեռնարկի իրագործումով փաստուեցաւ, թէ միասնական ուժերով եւ բոլորին մասնակցութեամբ, կարելի է հասնիլ գերազանց արդիւնքներու: Յիշենք, թէ ձեռնարկին հասոյթը, ներառեալ այս առիթով եղած նուիրատուութիւնները, հասան չորս հազար եւրոյի:

Պաշտօնական մակարդակի հանդիպումներ եւ ձեռնարկներ

Ուրբաթ, 11 Յունուար 2013-ին, Պետական Ներկայացուցիչը եւ տիկինը, յատուկ հրաւեր ստանալով, ներկայ գրտուեցան Եւրոպայի Ժողովրդային Կուսակցութիւններու ղեկավարներուն ի պատիւ տրուած պաշտօնական ընթրի-

քին, որ տեղի ունեցաւ Լիմասոլի Four Seasons պանդոկին մէջ:

Շաբաթ, 26 Յունուար 2013-ին, Տէր եւ Տիկին Վարդգէս Մահտեսեաններ, ներկայ գտնուեցան Քրիստոնէական Կեդրոնին մէջ տեղի ունեցած Հրեական Ողջակիզման ի յիշատակ կազմակերպուած միջոցառումին:

Չորեքշաբթի, 13 Փետրուար 2013-ին, Պրն. Մահտեսեան պաշտօնական այցելութիւն մը տուաւ Կիպրոսի մէջ Ամերիկայի Միացեալ Նահանգներու Դեսպան Ն.Վ. Ճոն Քէօնիկին: Պետական Ներկայացուցիչը իր ու Կիպրահայութեան երախտագիտութիւնն ու շնորհակալութիւնը փոխանցեց Պրն. Դեսպանին, անոր ցուցաբերած աջակցութեան եւ անդուլ աշխատանքին համար, որ ի գործ դրաւ, առ այժմ փրկելու Կիթթորիա փողոցին վրայ գտնուող Հայկական եկեղեցական համալիրը մշակութային կեդրոնի վերածուելու վտանգէն: Իր կարգին, Պրն. Դեսպանը շնորհաւորեց Հայ համայնքը, իր ցուցմունքներուն հետեւած ըլլալուն եւ համբերութեան համար: Այս առիթով, Պետական Ներկայացուցիչը Պրն. Քէօնիկին յանձնեց ճոխ թղթապանակ մը, որուն մէջ տեղ գտած էին Կիպրոսի մէջ լոյս տեսած հայատառ եւ օտարալեզու հրատարակութիւններ, պատմական արժէք ներկայացնող գրքոյկներ եւ արձանագրութիւններ, որոնք կը վերաբերին Կիպրահայ գաղութի ծագման, պատմամշակութային արժէքներուն եւ մինչեւ օրս հոլովոյթին: Ան Պրն. Դեսպանէն խնդրեց վերոնշեալ արժէքաւոր նիւթերը տեղադրել տալ Ամերիկայի Միացեալ Նահանգներու Քոնկրէսի գրադարանին մէջ:

Չորեքշաբթի, 6 Մարտ 2013-ին, Պետական Ներկայացուցիչը եւ տիկինը, հրաւեր ստանալով, ներկայ գտնուեցան Կիպրոսի նորընտիր Նախագահ Նիկոս Անաստասիատիսի ու իր ազնուափայլ տիկնոջ կազմակերպած ընդունելութեան, որ տեղի ունեցաւ նախագահական պալա-

տին մէջ:

Երեքշաբթի, 12 Մարտ 2013-ին, Տէր եւ Տիկին Վարդգէս Մահտեսեաններու բնակարանին մէջ, տեղի ունեցաւ հրաժեշտի ընթրիք՝ ի պատիւ Ալովաքիոյ Դեսպան Ն.Վ. Աննա Թուրինիչովայի, ներկայութեամբ կարգ մը այլ երկիրներու դեսպաններուն:

Ուրբաթ, 15 Մարտ 2013-ին, Պետական Ներկայացուցիչը եւ տիկինը ներկայ գտնուեցան Լաչչայի քաղաքապետարանի սրահին մէջ տեղի ունեցած Բազմամշակութային Հրաժեշտի երեկոյին՝ ի պատիւ Ալովաքիոյ ընթացաւարտ Դեսպան Ն.Վ. Աննա Թուրինիչովային: Այս միջոցառումին, իր սրտի խօսքը արտասանեց Պրն. Վարդգէս Մահտեսեան, ընդգծելով Դեսպանին ունեցած իւրայատուկ դերը ու տարած լայնածաւալ աշխատանքը, քով քովի բերելու Կիպրոսի բոլոր համայնքները: Այս երեկոյին, մի քանի պարերով, ելոյթ ունեցաւ նաեւ Համազգայինի «Սիփան» պարախումբը:

Ուրբաթ, 22 Մարտ 2013-ին, Կիպրոսի Կառավարութեան մօտ Կրօնական Փոքրամասնութիւններու հարցերով նո-



րանշանակ պատասխանատու՝ Տիկին Քեթի Քլիրիտու, իր իսկ փափաքով, հանդիպում մը ունեցաւ Պետական Ներկայացուցիչին հետ, մտնէն ծանօթանալու եւ քննելու Կիպրահայ Զամայնքի դիմագրաւած զանազան դժուարութիւնները:

Լեռնային Ղարաբաղի Զանրապետութեան Վարչապետի այց



Երկուշաբթի, 25 Մարտ 2013-ին Կիպրոս ժամանեցին Լեռնային Ղարաբաղի Զանրապետութեան Վարչապետ Տիար Արա Յարութիւնեան ու իր գլխաւորած պատուիրակուիւնը: Նոյն օրը կէսօրէ ետք, «Չիլթըն Փարք» պանդոկին մէջ տեղի ունեցաւ Վարչապետին հանդիպումը Կիպրահայ համայնքի գործարարներուն հետ «Socio-economic Development Programme and Investment Opportunities of Nagorno Karabagh» նիւթին ներկայացումով: Այս հանդիպումին, յատկապէս հրաւիրուելով, ներկայ գտնուեցան Կիպրահայ Զամայնքի Պետական Ներկայացուցիչ Պրն.

Վարդգես Մահտեսեան, ՀՀ Յունաստանի եւ Կիպրոսի արտակարգ ու լիազօր Դեսպան Պրն. Գագիկ Ղալաչեան եւ Կիպրոսի Թեմի Կաթողիկոսական Փոխանորդ Վարուժան Արքեպիսկոպոս Յերկելեան:

Նոյն օրը, Պետական Ներկայացուցիչը իր տան մէջ հիւրասիրեց Վարչապետ Յարութիւնեանը, ուր ներկայ էին Կիպրոսի Եւրոխորհրդարանի անդամներէն Դոկտ. Էլէնի Թեոխարուսը եւ Անտրէաս Փիթսիլիտիսը: Պրն. Մահտեսեան խօսք առնելով փափաք յայտնեց, որ ալ աւելի ամրապնդուին Կիպրոսի Եւրոխորհրդարանի անդամներուն եւ Հայաստանի ու Լեռնային Ղարաբաղի իշխանութիւններուն հետ սերտ կապերը:

Երեքշաբթի, 26 Մարտ 2013-ին, Պետական Ներկայացուցիչը, ընկերակցութեամբ Լեռնային Ղարաբաղի Վարչապետ Արա Յարութիւնեանի, այցելեցին Կիպրոսի Առետուրի եւ Արդիւնաբերութեան Գրասենեակի Նախագահ Պրն. Ֆիտիաս Բիլիտիսին:

Շնորհաւորական Գիրեր

Կիպրահայ Համայնքի Պետական Ներկայացուցիչ Պրն. Վարդգես Մահտեսեան, 4 Յունուար 2013-ին անջատ գիրեր յղելով, իր ու Կիպրահայութեան անունով շնորհաւորեց Ն.Ս.Օ.Տ.Տ Արամ Ա. Կաթողիկոսին, ՀՀ Յունաստանի եւ Կիպրոսի արտակարգ եւ լիազօր Դեսպան Ն.Վ. Գագիկ Ղալաչեանին եւ ՀՀ Սփիւռքի նախարար Տիկին Հրանուշ Յակոբեանին Նոր Տարին եւ Ս. Ծնունդը, մաղթելով անոնց արեւշատութիւն, իսկ մեր Մայր Հայրենիքին բարգաւաճում:

14 Յունուար 2013 թուակիր նամակով մը, Պետական Ներկայացուցիչը իր ու Կիպրահայ համայնքին անունով շնորհաւորեց Եւրոներեսփոխան Էլէնի Թեոխարուսը, վերջինիս նախաձեռնութեամբ ու ջանքերով հիմնուած Եւրոպական Միութիւն-Հայաստան Բարեկամական Խումբի

կազմաւորման եւ նախագահ ընտրուելուն ուրախ առիթներով: Ան իր խոր յուզմունքը եւ երախտագիտութիւնը յայտնեց հայասեր ու հայութեան անկեղծ բարեկամ Տիկին Թեոխարուսին, յաջողութիւն մաղթելով իր ապագայ աշխատանքներուն մէջ:

Երուսաղէմի Հայոց Պատրիարքութեան Ս. Աթոռին 97-րդ Պատրիարք ընտրուելուն առիթով, Պրն. Մահտեսեան Փետրուար 1-ին, յատուկ շնորհաւորագիր մը յղեց Ամենապատիւ Տէր Նուրիան Արք. Մանուկեանին, մաղթելով անոր քաջառողջութիւն եւ արեւշատութիւն:

Չորեքշաբթի, 20 Փետրուար 2013-ին, Պետական Ներկայացուցիչը շնորհաւորագիր մը յղեց ՀՀ Նախագահ Ն.Վ. Տիար Սերժ Սարգսեանին, շնորհաւորելով անոր վերընտրութիւնը ու մաղթեց, որ ան շարունակէ իր անսակարկ ծառայութիւնը ի սպաս դնել համայն հայութեան ընդհանրական ու գերագոյն շահեուն:

Կիպրահայ Համայնքի Պետական Ներկայացուցիչ Պրն. Վարդգէս Մահտեսեան, 25 Փետրուար 2013 թուակիր յատուկ գիրով մը, իր ու Կիպրահայութեան կողմէ ջերմօրէն շնորհաւորեց Պրն. Նիկոս Անաստասիատիսը, Կիպրոսի Նախագահ ընտրուելուն առիթով:

Իսկ Մարտ 1-ին, Պետական Ներկայացուցիչը անհատական նամակներ յղելով, իր շնորհաւորանքները փոխանցեց իւրաքանչիւր նորանշանակ նախարարի, անոնց փոխանցելով իր պատրաստակամութիւնը միասնաբար քննելու Կիպրահայութիւնը յուզող որեւէ հարց:



Ծանոթանանք Կիպրոսի Հանրապետության Օրենքներուն

«Եւրոկրուվ»ի եւ Կիպրոսի Կառավարութեան միջեւ Կարկային Համաձայնագիրի հիմնական կէտեր

Ստորեւ, հակիրճ ձեւով նշած ենք «Եւրոկրուվ»ի եւ Կիպրոսի Կառավարութեան միջեւ տնտեսական կայունացման գծով համաձայնուած կէտերը, որոնք 25 Մարտ 2013-ի առաւօտեան կանուխ ժամերուն հրապարակուեցան: Առ ի գիտութիւն յիշենք, ըստ մինչեւ օրս ստացուած տեղեկութիւններուն, **Լայիկի Դրամատան** մէջ գտնուող միայն մինչեւ 100,000 եւրօ խնայողական հաշիւները ապահովուած են: Գալով **Կիպրական Դրամատան** պարագային, մինչեւ 100,000 եւրօ խնայողական հաշիւները ապահովուած են, իսկ 100,000 եւրոյէն վեր հաշիւները ենթակայ պիտի ըլլան 40%-ի շուրջ հարկադրումի: Ինչ կը վերաբերի Կիպրոսի մէջ գործող մնացեալ դրամատուներուն, նոյնիսկ 100,000 եւրոյէն վեր հաշիւները ապահովուած են ու ենթակայ պիտի չըլլան հարկադրումի:

- **Լայիկի** դրամատունը անմիջապէս լուծարքի պիտի ենթարկուի բաժնետէրերու, բաժնետոմսերու եւ չերաշխաւոր-

լած գումարներու լրիւ մասնակցութեամբ:

- **Լայիկի** դրամատունը պիտի բաժնուի «Լաւ» եւ «Վատ» դրամատուներու: «Վատ» դրամատունը ժամանակի ընթացքին պիտի փակուի:

- «Լաւ» դրամատունը պիտի ներառուի **Կիպրական Դրամատան** (BOC) ներքոյ, իր հետ տանելով Արտակարգ Հնչուն Դրամի Աջակցութեան (Emergency Liquidity Assistance) կողմէն ստացած շուրջ 9 միլիառ եւրօ օժանդակութիւնը: Միայն չերաշխաւորուած խնայողութիւնները պիտի սառեցուին՝ մինչեւ անոնց վերաշահարկումը:

- Եւրոպական Կեդրոնական Դրամատան (ECB) Կառավարման Խորհուրդը պիտի շարունակէ **Կիպրական Դրամատան** հնչուն դրամի տրամադրումը՝ ըստ կիրառելի կանոններուն:

- **Կիպրական Դրամատունը** դրամագլուխներու վերադասաւորման (recapitalisation) պիտի ենթարկուի խնայողական հաշիւներու / բաժնետէրերու չերաշխաւորուած գումարներու փոխարկումով՝ բաժնետոմսերու եւ բաժնետէրերու լրիւ մասնակցութեամբ:

- Փոխարկումը այնպէս մը պիտի ըլլայ, որ ծրագիրի վերջաւորութեան ապահովուի 9% դրամագլուխի յարաբերակցութիւնը:

- Բոլոր դրամատուներուն մէջ երաշխաւորուած հաշիւներունցող հաշուետէրերը, պիտի պաշտպանուին ըստ Եւրոպական Միութեան օրէնսդրութեան:

- Տրամադրուած օժանդակութիւնը՝ մինչեւ 10 միլիառ եւրօ, պիտի չգործածուի **Լայիկի եւ Կիպրական Դրամատան** դրամագլուխներու վերադասաւորման համար:

**«Նանոր» Հայկական Մանկական Կեդրոն
2013-2014 Դպրոցական Տարեշրջան
Արձանագրություններ**

Սիրելի ծնողներ,

Այսու մեծ հաճությամբ կը յայտարարենք, թե «Նանոր» Հայկական Մանկական Կեդրոնի 2013-2014 դպրոցական տարեշրջանի **արձանագրությունները կը սկսին 15 Ապրիլ 2013-էն մինչեւ 15 Մայիս 2013** եւ կամ մինչեւ տեղերու ամբողջացումը:

Դպրոցական տարեշրջանը կը սկսի 2 Սեպտեմբեր 2013-ին: Կրնան արձանագրուիլ 4 ամսականէն մինչեւ 3 տարեկան երեխաները:

«Նանոր» Մանկական Կեդրոնը պիտի գործէ երկուշաբթիէն մինչեւ Ուրբաթ, ժամը 07.00-18.00 (ըստ պահանջարկի) որպէսզի գոհացում տրուի երկարաժամ աշխատանք ունեցող ծնողներու կարիքներուն: **Փակ պիտի մնայ միայն պետական տօներուն եւ Օգոստոս ամսուան ընթացքին:**

Յաւելեալ տեղեկութիւններու, վճարումի եւ այլ մանրամասնութիւններու համար կը խնդրուի կապ հաստատել 97-808414 թիւին ժամը 08.30 մինչեւ 14.30:

**Վարչական Խորհուրդ
«ՆԱՆՈՐ» ՀԱՅԿԱԿԱՆ ՄԱՆԿԱԿԱՆ ԿԵԴՐՈՆԻ**

Վարդգես եւ Մակի Մահտեսեաններ
 Քրիստոսի Յարութեան
 Սուրբ տօնին առիթով
 կը շնորհաւորեն
 Կիպրահայ Յամայնքը
 եւ մեր հայրենակիցները
 մաղթելով՝ առողջութիւն եւ
 արեւշատութիւն

Քրիստոս յարեալ ի մեռելոց,
 Օրհնեալ է Յարութիւնն Քրիստոսի

ԿԻՊՐԱՅԱՅ ՀԱՄԱՅՆՔԻ ՊԵՏԱԿԱՆ ՆԵՐԿԱՅԱՑՈՒՑԻՉԻ ԳՐԱՍԵՆԵԱԿ

Քաղաքական Գրասենեակ

9B & C Kastorias Street, Ayia Paraskevi, 2002 Strovolos
 Հեռախօս 22- 45 45 40, Հեռատիպ 22- 42 46 42
 Ել. Հասցէ office@armenianmp.com
 Ոստայնէջ՝ <http://www.armenianmp.com>

Խորհրդարանական Գրասենեակ

Office Δ-2-2, House of Representatives, 1402 Nicosia
 Հեռախօս 22- 40 72 02, Հեռատիպ 22- 40 74 42
 Ել. Հասցէ vmahdessian@parliament.cy